

# **REFERAT US - Utoqqaat siunnersuisoqatigiiffiat d. 03-06-2020**

**Mødedato** Onsdag d. 03. juni 2020 kl. 17:00

**Mødested** Imaneq 34, 2. sal – Ataatsimiittarfik

# Indholdsfortegnelse

Imaqarniliaq.....	3
-------------------	---

**Punkt .: Imaqarniliaq**

# Ilanngussaq 1

## Utoqqaat pillugit Siunnersuisooqatigiinni ataatsimiinnermit imaqarniliaq

**Piffissaq: Pingasunngorneq 3. juuni 2020 Nal. 13.00 – 15.00**  
**Sumi: Imaneq 34, 2. sal – Ataatsimiittarfik**

### **Peqataasut:**

Laannguaq Lyngem, siulittaasoq (LAL)  
Søren Joelsen, siulittaasup tullia (SØJ)  
Bodil Karlshøj Poulsen, ilaasortaq(BKP)  
Jonas Napaattoq, ilaasortaq– oqarasuaatikkut peqataavoq (JON)

Jill S. Hellesen, Suliffeqarnermut Isumaginninnermullu Ingerlatsivimmi pisortaagallartuq (JSH)  
Arnannguaq H. Christensen, Utoqqarnut suliassaqarfimmi fagchefti (AHC)  
Lars Jørgen Kleist, Utoqqaat pillugit Siunnersuisooqatigiinni allatsi, imaqarniliortuq (LJK)

Lone Isaksen – Kommuneqarfik Sermersuumi Puigortunngortut pillugit ataqatigiissaarisuq (LOI)  
Immikkoortuq 3-p oqaluuserineqarnerani taamaallaat peqataavoq.

### **Peqataannigitsut:**

Loritha Henriksen, ilaasortaq

### **Oqaluuserisassat:**

#### **1. Siulittaasumit Laannguaq Lyngemik tikilluaqqusineq oqaluuserisassanillu akuersissuteqartitsineq**

Siulittaasoq tikilluaqqusivoq. Oqaluuserisassat akuerineqarnerini immikkoortuq 3-p ilanngunneqarnissaa akuersissutigineqarpoq, Lone Isaksen - Kommuneqarfik Sermersuumi Puigortunngortut pillugit ataqatigiissaarisuq - ataatsimiinnermi akisussaaffeqarfimmik anguniagaasunillu saqqummiisutut peqataavoq. Lone Isaksen saqqummeereerinnermi kingorna ataatsimiinnermi peqataajunnaarpoq.

#### **2. Kingullermik ataatsimiinnermit imaqarniliaq – ulloq 14. maaji 2020**

Pisortaagallartup, Jill S. Hellesenip, immikkoortuq 4-mut allassimasuq allanngussasuq kissaatigaa:

- Utoqqaat pillugit Siunnersuisooqatigiit aammalu Nuummi Utoqqaat peqatigiiffiata u. 25. februaari 2020-mi ataatsimeeqatigiinnerat

*Maannakkut killiffik pillugu pisortaagallartumit Jill S. Hellese nimit paasissutissiissutigineqarpoq, killiffillu tassaavoq blok 10-mi init atornagit utoqqaat ornittagassaannik naleqquttumik pissarsiniarneq kommunimit ilungersuutigineqartoq. 2020-mi aasarunnaariartornerani paasisaqaqqinnissaq naatsorsuutigineqarpoq.*

*Tamatumanittaaq ukiuni tulliuuttunut 15-inut illuliassatut sanaartugassatullu kissaatinut immikkoortumut pilersarusiornissaq Kommuneqarfik Sermersuumit sulissutigineqarpoq, tassanilu utoqqaat puigortunngortullu pillugit suliasaqarfimmi pisariaqartitat pingaartinneqarlutik.*

Tamassuma kingorna imaqarniliaq akuersissutigineqarpoq.

### **3. Lone Isaksen – Kommuneqarfik Sermersuumi Puigortunngortut pillugit ataqatigiissaarisooq - akisussaaffit aammalu siunniussat imarisaat pillugit nassuiaavoq**

Lone Isaksen suliarisartakkani pillugit paasissutissiivoq, ukuusut:

- Utoqqarmik puigortunngorsimasutut pasitsaassaqaartoqartillugu angerlarsimaffinnut pulaarneq.
- Utoqqaat illuinut pulaarneq – tassanilu utoqqaat illuini ningiuusut suleqatigineqartarput, aamma sulisut ilitsersuukkiartorsinnaarsarlugit.
- Puigortunngortut pillugit ataqatigiissaarisooq qaammatit tamaasa sulisunut ilinniartitsisarpoq – puigortunngorneq pillugu soqutiginnittunut saqqummiisoqarnissaanut pisariaqartitsisoqarneratigut kikkulluunniit saaffiginnissinnaasut paasissutissanillu allanik pissarsinissaq pillugu piumasaqaateqartoqarsinnaavoq.
- Kalaallisut qallunaatullu paasissutissalinnik quppersagaliortoqarlunilu allagartarsualiortoqarpoq. Puigortunngorneq pillugu paasissutissat allagartarsualiarineqartut bussit unittarfiinut allagarsiunneqarput, aamma Kommuneqarfik Sermersuup nittartagaanut ikkunneqarput.
- Maannakkut suliat innuttaasunut tunngasut 167-iupput.

Taassuma saniatigut pissaanermik atuisarneq pillugu sulisut ilinniartinneqarlutillu pikkorissartinneqarput.

Sorpasuit Coronaqarneratigut ilungersunartorsiorfiupput.

- Pissaanermik atuineq pillugu ilitsersuut nutarterneqarpoq.
- Tallimangornerit tamaasa nal. 10.00-12.00 akornanni oqarasuaatikkut saaffiginninnissaq ammasarpoq – aammali pinartumik pisoqartillugu oqarasuaatikkut saaffiginninnissaq periarfissaavoq.

#### **Apeqqutit:**

SØJ: Innuttaasut 167-it, kisitsisit Kommuneqarfik Sermersooq tamakkerlugu atuuppat?

LOI: Aap, Nuummiupput innuttaasut 47-t, taakkulu utoqqaat illuini najugaqarput – aammalu utoqqaat ataatsimut najugaqatigiiffiini innuttaasut qulit. Ittoqqortoormiini, Tasiilami, Paamiuni aammalu Qeqertarsuatsiaani utoqqaat ataatsimut najugaqatigiiffiini najugaqartut 20-upput.

BKP: Puigortunngortut pillugit annertuumik eqqartuivugut – aammalu kisitsisit ataatsimiinnitsinni pissarsiaavut qiviaraanni takusinnaavarput puigortunngorsimasut amerlasuut suli nappaataannik naliliiffigineqarsimanngitsut.

Innuttaasut puigortunngornermik naliliiffigineqartarnissaannut peqqinnissaqarfimmut attaveqarniarluni illit ataqatigiissaarisutut ikiuuttarpit?

LOI: Puigortunngorsimasut naliliiffigineqartarnissaat pillugit peqqinnissaqarfimmut attaveqartarnerup pitsanngorsarneqarnissaanut suliniuteqarpugut.

BKP: Maannakkut qanoq attaveqarnej ingerlava? Aamma puigortunngortut naliliiffigineri sukkanerusumik ingerlanneqarpa?

Naak uagut Utoqqaat pillugit Siunnersuisooqatigiinni annertunerusumik sulinernut sunniuteqarsinnaanngikkaluarluta taamaattoq kisitsisit takutippaat puigortunngornissamut pasitsaassat amerlasut suli nappaatigisinnaasaannik naliliiffigineqarsimannigitsut?

Uani aamma eqqarsaatigaara politikkikkut annerusumik eqqummaariffigineqartariaqartoq – suli puigortunngorlutik naliliiffigineqarnissartik sivilunerusumik utaqqinnginnissaat pillugu.

AHC: Kommuneqarfik Sermersuup Peqqinnissaqarfiullu ajornartorsiut eqqartorpaat, ajoraluartumillu misissuinissamut Peqqinnissaqarfik sulisussaqaanngilaq.

Taamaattumik aaqiisoqarpoq, aaqiisoqarneralu malillugu - innuttaasoq angerlarsimaffimmini najugaqartoq puigortunngorsorineqarsimappat innuttaasup pissusilersornera malillugu kommunip (puigortunngortut pillugit ataqatigiissaarisut) immersugassaq immersussavaat, immersugarlu kingorna peqqinnissaqarfimmut ingerlateqqinneqassaaq.

Tamatuma kingorna immersorsimasaq tunngavigalugu innuttaasoq puigortutut pissusilersornera peqqinnissaqarfimmit nalilerneqassaaq, taava tassanngaanniit pineqartoq puigortutut naliliiffigineqarsinnaalluni.

Innuttaasut 167-it sullitarisatta akornanni taamaallaat 30-40-t akornanniipput naliliiffigineqarsimasut.

Taamatut aaqiineq uagutsinnut ersarinnerulissaaq – immersuinikkut, Peqqinnissaqarfiullu naliliinerani qassit puigortunngorsimansut takusinnaalissavagut, aammalu politikerit suliniuteqarnissamut aalajangiinissaannut ajornaannerulersitsissaaq.

LAL: Puigortunngorsimasumut ilaqutariiusut akornanni puigortunngortunut suliniuteqartoqannginnissaanut kissaateqartoqarsimasoq paasitneqarpunga. Tamatut pisoqartillugu iliuusissanik eqqarsaateqartoqarnikuunerluni? Soorlu innuttaasoq 80-ileereersimappat pitsaaliuinissaq eqqarsaatigalugu Kommune paasiniaalluni pulaartassanerluni?

AHC: Kingusinaartarnej pisinnaasarpoq, tassa puigortunngorneq ima sunniuteqarsimatigaluni suleqatigiinneq ajornakusuulersinnaalluni. Taamaattumik paasissutissanik suliarineqarnikuupput – ilaqutaasut nalussanngilaat sumut saaffiginnissallutik aammalu qanoq iliorsinnaanerlutik. Tassani aamma pineqarluni piffissaagallartillugu suliap aallartittarnissaa.

Puigortunngorneq piulereersoq suliamik aallartitsisoqassappat, innuttaasup angerlarsimaffianut iserniarnej ajornakusuulersinnaavoq, soorluttaaq innuttaasoq imminut navianartorsiortissinnaasartoq. Taama pisoqartillugu pissaanermik atuinissaq pisariaqalersinnaasarpoq. Tamannalu sapinngisamik ilaqutaasut peqqinnissaqarfillu suleqatigalugit pisarpoq.

LOI: Illassutigalugu aamma nunarsuarmi nappaatit assigiinngitsut Kalaallit Nunatsinni atugaajartuinnarneranni aammalu Kalaallit Nunaanni atugaalertussaammata eqqumaffigaagut. Aamma ilaqutaasut qasulersimagaangata, tassa saaffiginnissuteqaraangata, arlaanik iliuseqartoqartariaqartartoq oqaatigisariaqarpoq.

JON: Apequtigaa – sulisunik paasisimasalinnik Ittoqqortoormiunut ornigussinnaanersut?

LOI: 2018-imi Kommuneqarfik Sermersuumiit sulisut Ittoqqortoormiiniipput. Taassuma saniatigut utoqqarnik sullissisut aammalu angerlarsimaffinni ikiortit siunnersornissaannut ataatsimeeqatigineqartarput. Taamatut pissapput naak attaveqaatit ilungersunarsinnaasaraluartut. Kisianni aamma pisariaqartittoqartillugu orniguttarpugut.

BKP: Inuit angerlarsimaffiitut isiinnartoqarsinnaanngitsoq tunngaviusumik inatsit malillugu tamatta pisinnaatitaaffigaarput. Taanna pillugu Lone illit ilinniartitsinerni ilannguttarpiuk – uani aamma pineqarpoq pissuserissaarnissaq.

LOI: Immikkoortut tamakku tamaasa eqqummaariffigaavut, aamma ilaquataasut suliani peqataatinneqartarput. Tikilluaqqusaanngikkutta isiinnavissinnaanngilagut. Taamaattumik isernissamut misiliisarpugut itigartitaagaangattalu misileeqqittarpugut, aatsaallu akuerineqaraangatta isertarluta.

SØJ: Peqqinnissaqarfiup taaguutaa apequtigivaa. Taaguutaa akuerisaanersoq apequtigalugu - tassami Peqqinnissaqarfiup isumaa apeqqusernartoqartikkamiuk. Oqaaseq Peqqinnissaqarfik tassaammat peqqinnerulernissaq anguniarlugu isumalik. Kisianni peqqissaaviit taanna taamatut taaneqartariaqarluartut – tassami peqqississagutta uninngasariaqaratta. Tassami oqaatsip kalaallisuaa ippinnarami.

LAL: Uagut Utoqqaat pillugit Siunnersuisooqatigiit taaguutaa aaqqissinnaannginguatsiarparput tassami pisortat pisortaqrarfiit taaguutaat akuersisartut akuerisimassammatigit. Taakkuuppullu oqaatsimik atorneqartumik akuersissuteqarsimasut.

#### **4. Paasissutisseeqatigiinneq.**

##### **Utoqqarnut susassaqarfimmi fagcheffi – Arnannguaq H. Christensen**

###### **Killiffik:**

- Annerusumik soqanngilaq. Taamaakkaluartoq nunarput avammut ammaqqilerpoq, aamma Utoqqaat Illuini Angerlarsimaffimmilu ikiortini nappaatip tuniluuttup takkuteqqeritaaqqinnissaanut sulisut piareersarlugit, utoqqaat illersorniarlugit najugaqartut sullitalu. Ataatsimiinnerup siulianit imaqarniliami atuarneqarsinnaasutut blok 10-mi Ornittakkamit naleqqunnerusumik utoqqaat Ornittagassaannik nutaamik pilersitsinissaq sulissutigineqartoq oqaatigisariaqarpoq.

##### **Utoqqaat pillugit Siunnersuisooqatigiinnit siulitaasoq – Laannguaq Lyngø**

###### **Killiffik:**

Tusagassiortunngorniartumit Utoqqaat pillugit Siunnersuisooqatigiit pillugit paasisaqarusuttumit saaffigineqarpoq, taannalu oqaloqatigivaa paasivaalu ilinniakkaminut atatillugu nalilerneqartussamik suliakkerneqarsimasoq.

SØJ: Ilassutigivaa tusagassiortunngorniartut Utoqqaat Ornittagaanukarlutik apersuiartornissaat pissusissamisoortoq. Taamaaliornikkut ilisimasaqarnerulissapput ilisimasatillu ingerlateqqillugit,

aamma oqaatigineqarpoq ungasissorsuunngitsumi tusagassiortoq Pilutamiippoq apersuiartorluni.

JON: Issiaviit pillugit Ittoqqortoormiini ajornartorsiutaavoq.

AHC: Kommune tamarmi pineqarmat ingerlatsivimmut saaffiginnittoqartassaaq, pissutigalugu illoqarfiit nunaqarfiillu tamarmik issiaveqassammata.

## 5. Ataatsimiinnermit kingullermit malitseqartitsineq:

**5.a Utoqqaat pillugit Siunnersuisooqatigiit Kommuneqarfik Sermersooq tamaat siunnersuisooqatigiupput. Taamaattumik 2017-imiit 2021-mut qinigaaffik tamaat ilaasortaapput.**

**Utoqqaat pillugit Siunnersuisooqatigiit illoqarfinni tamani utoqqaat ataatsimeeqatiginissaat anguneqassasoq pillugu periarfissat Suliffeqarnermut Isumaginninnermullu Ataatsimiititap eqqartussagai innersuussutigineqarpoq.**

Paamiuni Utoqqaat peqatigiiffianut Kigaatsunut allakkanik nassiussisoqarpoq.

Killiffik: Ingerlatsivimmit: Paamiuni utoqqaat peqatigiiffianni siulittaasoq, Peter Petersen, oqarasuaatikkut oqaloqatigineqarpoq. Kommuneqarfik Sermersuumi Utoqqaat pillugit Siunnersuisooqatigiit Paamiunut tikeraarlutik sulinertillu pillugu innuttaasunik ataatsimiititsillutik pinissaat Paamiuni utoqqaat peqatigiiffiata taperseraat Peter Petersenip ilisimatitsissutigaa.

LJK: Nassuiaateqarpoq Utoqqaat pillugit Siunnersuisooqatigiit 26. februaari 2020-mi ataatsimiinnerminni Utoqqaat pillugit Siunnersuisooqatigiit Paamiuni Tasiilamilu innuttaasunik ataatsimiititsinissartik eqqartorpaat, tamatumunngalu atatillugu Paamiuni Tasiilamilu Utoqqaat Peqatigiiffii allakkatigut aperineqassapput sunik kissaateqarnerisut.

Allakkiaq Utoqqaat pillugit Siunnersuisooqatigiinni siulitaasumit atsiorneqarpoq, maannakkut Paamiuni Utoqqaat Peqatigiiffiani Kigaatsuniit Peter Petersenimit oqarasuaatikkut akissuteqarfigineqarput kissaatigalugu ataatsimiitinneqarnissartik.

LAL: Innersuussutigaa Covid-19 suli atuummat maannakkut aalajangiisoqartariaqanngitsoq - aamma aasaanera qaangiutereerpat ataatsimiinnerup tullissaani isummertoqarumaartoq. Tamatumunnga pequtaavoq maannakkut maleruaqqusat malillugit inuit 100-t sinnerlugit katersuuteqqusaannginnamik. Tamatuma saniatigut Utoqqaat pillugit Siunnersuisooqatigiit qinigaaffiata qaangiunnissaanut ukioq ataasiinnanngorpoq, taamaattumik Utoqqaat pillugit Siunnersuisooqatigiit suleriaasaat nutaaq apeqqutaalluni angalaneq piviusunngorsinnaalluni.

BKP: Aasalersorsuummat aasap kingorna aalajangiinissaq pissasoq kissaatigaara. Taamaattoq oqaatigerusuppara Utoqqaat pillugit Siunnersuisooqatigiit eqaatsumik suleriuseqartarput, taamaattumik Paamiuni ataatsimiititsinissami inuit 100-t sinnerlugit takkutissagaluarpata taava ataatsimiititsinerit marluk ingerlassinnaavagut.

SØJ: Aggustip qaammataani ataatsimiinnissatsinnut innuttaasunik ataatsimiitseratarsinnaanerput aalajangiiffigissagipput kissaatigaara.

LJK: Oqaatigaa aalajangiiffigineqassasoq, aamma Suliffeqarnermut Isumaginninnermullu Ataatsimiititamut aningaasaliissuteqartoqarnissaanik qinnuteqartoqassasoq,

ataatsimiititamummi qinnuteqartoqassappat Aningaasaqarnermut Inuussutissarsiornermullu Ataatsimiititamit akuersissutigineqaqqaartussaavoq.

JSH: Naqqiissuteqarpoq ataatsimiititap ataatsimiinnissaanut Utoqqaat pillugit Siunnersuisooqatigiit oqaluuserisassanngortitsisinnaanerap periarfissaanngitsoq aamma angalanissamut aningaasaliissuteqartoqarnissaanut Suliffeqarnermut Isumaginninnermullu Ataatsimiititamut qinnuteqartoqarsinnaanngitsoq. Utoqqaat pillugit Siunnersuisooqatigiit angalanissaannut aningaasartuutit aningaasaliiffigineqarnissaannut periarfissat ingerlatsivimmit misissorneqassapput. Misissuineq pereerpat akissut ingerlatsivimmit Utoqqaat pillugit Siunnersuisooqatigiinnut ingerlateqqinneqarumaarpoq.

LAL: Periarfissat assigiinngitsut ujartorneqarsinnaapput, aamma Paamiuni Najukkami Ataatsimiititaliaq qinnuteqarfigineqarsinnaanersoq misissorneqarsinnaavoq.

LJK: Kisianni Najukkami Ataatsimiititaliamut qinnuteqarneq ajornakusoorfiusimavoq, oqarput Qeqertarsuatsiaanukarusuttoqarmat, tassa kommunip killeqarfiata iluaniittumut, Ataatsimiititaliaq aqputigalugu pitsaanerusemik sulineq ingerlanneqarsinnaasoq - taamanikkut Nuummi Najukkami Ataatsimiititaliaq aqputigalugu qinnuteqarput itigartitaallusilu, taamaattumik angalanerap atillugu aningaasartuutaasut matussuserneqarnissaannut Faghcefhup Annannguaq H. Christensenip missingersuutai ajoraluartumik atorsimallusigit.

JSH: Utoqqaat pillugit Siunnersuisooqatigiit ataatsimeeqqinnissaa sioqqullugu tapiiffigineqarnissamut periarfissat misissorneqassasut siunnersuutigaa. Tamatumani saniatigut COVID-19-eqarnera eqqarsaatigalugu pissutsit nalinginnaasunngornissaasa tungaanut angalanissamut pilersaarutit kinguartinneqarallassasut ingerlatsiviup innersuussutigaa. Paamiunut timmisartukkat angalanep ammagaluartoq sulinerap atillugu angalanerit pisariaqavissut kisiisa pinissat kommunip aalajangiusimavaa.

JON: Utoqqaat pillugit Siunnersuisooqatigiit Ittoqqortoormiut tikeraarnissat pilersaarutaava?

LJK: Kommunip illoqarfii tamaasa tikeraarneqassasut februaarip qaammataani ataatsimiinnermi kissaatit oqaatigineqarpoq. Pilersaarummi tamatumani Paamiut, Qeqertarsuatsiaat (februaarimi tikinneqarpoq), Tasiilaq aamma Ittoqqortoormiit tikikkusutatut taaneqarput. Kisianni Corona pissutaalluni suna tamarmi ajalusoq, allaat 2020-mi apriliip ulluisa 22-anni ataatsimiinnissaq taamaatiinneqarpoq, aatsaallu maajip ulluisa 14-ianni pilluni – kisianni februaarip qaammataani ataatsimiinnermi kissaatigineqarpoq Ittoqqortoormiit qinigaaffik 2017-2021-mi tikinneqassasoq.

#### **Aalajangerneq:**

Utoqqaat pillugit Siunnersuisooqatigiit tulliani ataatsimiinnissaq pitinnagu angalanissamut tapiiffissatut periarfissat ingerlatsiviup misissussavai, malittarisassallu atuuttut malillugit qanoq tapiiffigineqarnissamut periarfissaqarnerasoq misissorneqassaaq.

#### **5.b Kommuneqarfik Sermersuumi puigortunngorsimasut amerliartornerat pillugu Utoqqaat pillugit Siunnersuisooqatigiit ernumassutaat – allakkat Suliffeqarnermut Isumaginninnermullu Ingerlatsivimmut ingerlatinneqarput.**

Allakkat Suliffeqarnermut Isumaginninnermullu Ataatsimiititamut nassiinneqarnikuupput.

Killiffik:

LAL: Tassani pineqarpoq innuttaasut puigortunngorsimasut amerliartortut pillugit KS qanoq pilersaaruteqarnersoq. Allakkat Suliffeqarnermut Isumaginninnermullu Ataatsimiititamat nassiunneqarnikuupput.

JSH: Ataatsimiititamat ataavartumut allakkamik nassiussisoqartillugu Pisortaqatigiit Allatseqarfiata ataatsimiititallu saaffiginnissutit tigusarpaat. Utoqqaat pillugit Siunnersuisooqatigiit akissutisisimannikkunik eqqaasitsissummik nassiussisoqarnissaa innersuussutigineqarpoq. Pisortaagallartup ataatsimiititami siulittaasumut ataatsimeeqatigiilerunik eqqaassavaa.

LAL: Tulliani ataatsimiinnissami akissummik takorusunnassaqaq, aamma nukinginnarsiartormat aatsaaginaq saqqummiisup kisitsisit takutippai.

JSH: Siulittaasoq juunip ulluisa arfineq-pingajuanni ataatsimeeqatigissavara – tassani qulequtaq eqqaajumaarpara.

## **6. Kommuneqarfik Sermersuumi inuit puiguttormik nappaatillit ilaqutaasa akornanni misissuineq uannga suliarineqartoq: Kamilla Nørtoft aamma Tenna Jensen Arktisk Aldring Januари 2020**

Ingerlariaqqinnissaq:

BKP: Peqalnera ajunngilluinnarpoq. Ukiut qulit ingerlanerini sivisuumik apersukkat 13-iinnaasimapput. Nuannerporli puigortunngortut pillugit ataqatigiissaarisup qulequttat pingaernerit pingasut paasissutissanik imaqartut ilanngussimammagit. Taamaattoq kissaatigineqarsinnaavoq annertunerusumik suli misissuisoqarnissaa.

LAL: Aamma malunnarami tassani mississukkami taamatut misissuisarnerit anikitsuinnarmik pisarsimasut – una aamma misissuineq allaat taaneqarsinnaammat tusartakkagut paasisartakkagullu aallaavigalugit pisoqalereersutut taaneqarsinnaavoq.

Taamaattumik misissuisarnerit ingerlaavartuunissaat kissaatiginaqaq. Una aamma eqqartorsimasaat tassa puigortunngorsimasut peqatigiiffeqartariaqaraluarnerat. Immaqa qaqinneqarsinnaagaluarpoq ataqatigiissaarisoq suleqatigalugu.

BKP: Misissorneqarsinnaavoq, aamma Iisimatusarfik suleqatigalugu misissuineq ingerlanneqarsinnaavoq, Utoqqaat pillugit Siunnersuisooqatigiit innersuussummik allakkiaqarsinnaasuuppata pitsaasuusaaq. Assersuutigalugu sammisaq pillugu immikkut allaaserinnissutigineqarsinnaasuuppat pissangagissagipput allassinnaavugut.

JSH: Utoqqarnut susassaqarfik eqqarsaatigalugu pitsanngorsaanissamat iluaqutaasinnaasunik isumassarsiffiusinnaasunillu misissuinernik iliuitsinillu peqartarnera kommunimit qujarunneqarput. Immikkut allaaserinnissuteqartoqarsinnaanera nuannissagaluqaq – uanga nammineq allaaserinninnikuuvunga – itisiligassarpassuaqarlunilu nutaamik eqqarsalernissamat periarfissaqarpoq, assersuutigalugu isumaginninnermi teknologii atorlugu.

AHC: Ilumoorpoq qulequttat taakku 13-it taakkartorneqartut taakkoqqissaat ajornartorsiutaapput. Paasissutissakippallaarpoq, aamma suliniutit assigiinngitsut atorlugit kingusinaarluta

qisuariartarpugut, ersarinngippallaarpugut. Alloriarnernik marlunnik siulliorusuppugut, ullumikkut taamaangilagut.

Puigortunngortut pillugit ataqatigiissarisup aappaa soraarpoq, suliassarpassuaqarattalu nutaamik atorfinitsissalluta. Siunissarlu pillugu amerliartuinnartut ilumuussappat, utoqqartavut kimit paarineqassappat? Suliassat amerliartuinnarnerinik innuttaasut paasitittussaavagut, taamaattumik ilinniarnissaq pisariaqarpoq. Uaguuvugullu aqutissiuissat, pissutigalugu ukiut qulit matuma siorna kisitsisaatigisat ullumikkut piviusunngornikummata, taamaattumik ukiut tulluuttut qulit siumut eqqarsareertariaqarpugut, eqqoriaanerlu piviusunngussappat suliassat angisoorujussuannngortussaapput.

**Aalajangerneq:**

Utoqqarnut susasaqarfik ilisimatusarfigineqassasoq Utoqqaat pillugit Siunnersuisooqatigiit ilisimatusarfimmuut innersuussillutillu kaammattuipput.

Bodili allakkiornissamut siunnersuusiussaaq Ingerlatsivimmullu ingerlateqqillugu.

**7. Utoqqarnut tunngasunik kisitsisinngorlugu takussutissaq (Oqaluuserisassanut ilaajuaannartoq):**

**Aalajangerneq:**

Ataatsimiinnissap tullianut kisitsisit nutaat saqqummiunneqassapput.

JSH: Kisitsisit eqqarsaatigalugit ullut kingulliit 14-it annertunerusumik susoqarsimanngilaq. Naamineq tupaallaatigilaarpara ilissi ataatsimiinnerit tamaasa kisitsisinik nutaanik pisartusi, tassami ataatsimiititaq takusaqarneq ajormat.

Taamaattumik tulliani ataatsimiititap ataatsimiinnissaani kisitsisinik utoqqarnut tunngasut saqqummiunneqassapput. Taamaammatt kisitsisit pissarsiasi qaammatit tamaasa, kvartalikkaartumik imaluunniit ukiut affakkaartumik agguanneqartassanersut nalilissavara.

LAL: Utoqqaat pillugit Siunnersuisooqatigiit aalajangiismanertik malillugu kisitsisit pisarpaat. Imaassinnaavoq Utoqqaat pillugit Siunnersuisooqatigiit qinigaaffiup tulliani allatut suleriuseqartut, aamma kisitsisit maannakkutut pissarsiarisassaneraat namminneq aalajangissavaat.

Kisianni maannakkumut pisartakkagut pitsaasuupput.

JSH: Imaatut paasineqassava, kisitsisit ataatsimiinnerit tamaasa pissarsiarisarneri iluarineqartoq?

LAL: Ilumut iluaqutaapput – assersuutigalugu puigortunngorsimasunut inissiat pillugit maannakkut saaffiginnissutigisarput, nalilersuinitinnit tunngaveqarpoq, aamma pisariaqartitsineq eqqummaariffigerusukkatsigu.

**8. Utoqqaat Danmarkimut nussornerat**

Utoqqaat Danmarkimut nussornerat pillugit kisitsisunik nutaamik suli peqanngilaq. Kisitsisit nutaajunerpaat maaji 2020-meersuupput, Kalaallit Nunaanni Naatsorsueqqissaartarfimmeersuupput.

Tusaatissatut tiguneqarpoq.

## 9. Taasariaqartut allat

JSH: Utoqqaat pillugit Siunnersuisooqatigiinniit allakkat marluk ulloq 13. maaji 2020-mi tiguagut.

- Utoqqaat ornittagassaannik allamik peqalernissaa pillugu
- Puigortunngortut inissiassaannik sanaartornissanut pilersaaruteqarneranik apeqquteqaat

Utoqqaat peqatigiiffiata ininik nutaanik atorsinnaaneranut tunngatillugu sukumiisumik aaqqiisoqarnissanut sulissuteqartoqarpoq. 2020-mi aggustip qaammataata naanerani tamanna pillugu ingerlatsivimmit nalunaaruteqartoqarnissaa naatsorsuutigineqarpoq.

Init kommunip pigisaanik Utoqqaat peqatigiiffiata atorsinnaasaanik neqerooruteqarnissaq pineqassaaq, tassa imaappoq, nutaamik sanaartortoqarnaviannngilaq. Siunissaq ungasinnerusooq eqqarsaatigalugu utoqqarnut sullissivimmik sanaartortoqarnissaa eqqartorneqassaaq. Tamannali sanaartornissamut pilersaarutit allat ilanngullugit politikikkikut eqqartuisoqarlunilu pingaarnersiuisoqarumaarpoq.

- Puigortunngortut pillugit sanaartortoqarnissanut tunngatillugu siunissami pilersaarutitut tunngasut eqqartorneqarnissaa Arnannguup pisariaqartippaa.

Sanaartornissamut tunngatillugu qanoq pisoqarnera malinnaaffigissavarput, Kommuneqarfik Sermersooq qiviariaraanni, Tasiilami aamma Nuummi inissaaleqisoqarpoq.

BKP: Illoqarfinni issiaartarfinnik ikkussuisoqarsinnaanersoq apeqqutigivaa.

LJK: Assigiinngitsunik saaffiginnittoqarpoq, aamma Utoqqaat peqatigiiffiisa ataatsimiinnerini tamakku ilanngussuunneqarnissaat kissaateqartoqarluni. Oqaluffiup eqqaani Brugsenillu eqqaani issiaartarfinnik ikkussuisoqarnissaa kissaatigineqarpoq.

Nuummi aamma Kommuneqarfik Sermersuumi illoqarfinni nunaqarfinnilu allani issiaartarfinnik ikkussuisoqarnissaa eqqarsaatigalugu Ingerlatsivik Sanarfinermut Avatangiisinullu Ingerlatsivimmut apeqquteqaateqassaaq.